

18/08/1997

Buku kenangi perjuangan Tun Razak

KUALA LUMPUR, Ahad - Generasi kini dan akan datang dapat mengenali dan menghayati sejarah perjuangan Bapa Pembangunan Negara, Tun Abdul Razak dengan lebih mendalam melalui sebuah biografi bergambar berjudul Tun Razak: Jejak Bertapak Seorang Patriot.

Biografi itu hasil susunan dan karangan bekas Ketua Pengarang Kumpulan Utusan Melayu, Datuk Zainuddin Maidin atau lebih dikenali sebagai Zam mengandungi rentetan sejarah awal dan jasa bakti Tun Razak sehingga beliau menjadi Perdana Menteri kedua.

Buku setebal 328 halaman itu yang akan dilancarkan oleh Perdana Menteri, Datuk Seri Dr Mahathir Mohamad pada 20 Ogos ini diterbitkan bersama Lembaga Amanah Yayasan Tun Razak dan Utusan Publications & Distributors Sdn Bhd.

Perjuangan Tun Razak yang cuba merapatkan jurang kemiskinan antara kaum, memadamkan api perkauman di kalangan rakyat dan membangunkan negara dengan Dasar Ekonomi Baru diabadikan dalam buku yang dimulakan dengan puisi karya Firdaus Abdullah bertajuk Terima Kasih Tun Razak.

Tun Razak dilahirkan di Pulau Keladi, Pekan, Pahang pada 11 Mac 1922.

Kecemerlangan dalam politik dan akademik mengangkat beliau sebagai Menteri Besar Pahang pada usia 33 tahun dan sebagai Perdana Menteri 15 tahun kemudian.

Selepas tragedi berdarah 13 Mei 1969, beliau melancarkan Dasar Ekonomi Baru sebagai pendekatan kerajaan untuk menyejukkan bahang perkauman dan meningkatkan taraf hidup rakyat tanpa mengira kaum.

Beliau meninggal dunia dengan meninggalkan jasa dan budi tidak terbilang di London pada 12 Januari 1976.

Dalam biografi itu, Zainuddin turut memuatkan gambar Tun Razak bergambar dengan Yang Di-Pertuan Agong Tuanku Ja'afar ketika zaman persekolahannya di Kolej Melayu Kuala Kangsar.

Perjuangan Tun Razak tidak ternilai harganya. Walaupun buku ini masih belum dapat membalas jasa beliau, generasi kini dan akan datang seharusnya memiliki khazanah ini bukan saja sebagai bahan tatapan tetapi untuk dihayati dan dijadikan pedoman dalam menghadapi alaf baru.

(END)